

湘城訪古錄卷七

善化陳運溶芸畦纂

書院類

嶽麓書院

一統志云在善化縣西嶽麓山下宋開寶中潭州守朱洞建實彭城劉鼇剏之淵鑑類函云劉珙知潭州舊有嶽麓書院真宗朝蕪廢公一新之養士數千人延禮佳士方輿勝覽云湖南路潭州嶽麓書院在嶽麓山下畫墁集云嶽麓書院有孔子堂御書閣堂廡尙完清泉經流堂下景意極于瀟湘文獻通考云宋

湘城訪古錄卷七

書院

真宗大中祥符八年賜潭州嶽麓書院額始開寶中郡守朱洞首度基創宇以待四方學者李允則來爲州請於朝乞以書藏方是時山長周式以行義著八年詔見便殿拜國子學主簿使歸教授詔賜書院名增賜中秘書玉海云開寶九年潭州守朱洞始創宇於嶽麓山抱黃洞下以待四方學者作講堂五間齋序五十三間孫邁爲記咸平二年潭守李允則益崇大其規模三年王元之爲記曰西京首述文翁東觀先書衛颯其理蜀郡教桂陽率以庠序爲先云云中開講堂揭以書樓塑先師十哲之象畫七十二賢瀟湘爲洙泗荆蠻爲鄒魯四年二月二十日

辛卯允則奏嶽麓山書院修廣舍宇生徒六十餘人請下國子監賜諸經釋文義疏史記玉篇唐韻從之祥符五年山長周式請於太守劉師道廣其居譚綺爲記式以行義著八年召見便殿拜國子主簿使歸教授給詔因舊名賜額朱子撰南嶽處士吳晦叔行狀云長沙故有嶽麓書院國初時郡人周式爲山長教授數百人後更變亂院廢而山長罷五峰方辭秦氏禮命嘗請爲之不報乾道初建安劉公珙始復立焉猶虛山長不置至是轉運副使九江蕭侯之敏始以禮聘君請爲之君曰侯之意則美矣然此先師之所不得爲者豈可以否德忝之哉卒辭不

湘城訪古錄卷七

書院

二

能蕭侯亦高其義不強致也

宋張栻潭州重修嶽麓書院記 潭州嶽麓書院開寶九年知州事朱洞之所作也後四十有五年李允則來爲請於朝因得賜書藏焉是時山長周式以行義著祥符八年召見便殿拜國子主簿使歸教授始詔因舊名賜額仍增給中秘書於是書院之稱聞天下紹興初更兵革灰燼十一僅存已而遂廢乾道元年建安劉侯珙安撫湖南既剔蠹吏姦民俗安靖則葺學校訪儒雅思有以振起之湘人士合辭以書院請侯竦然曰是固章聖皇帝所以加惠一方勸厲長養以風天下者而可廢乎乃屬州學教授金華邵穎經其事未半歲而成大抵悉還舊規某從多士往觀焉愛其山川之勝堂序之嚴裴徊不忍去喟然而與之言曰侯之爲是舉也豈將使子羣居族譚但爲決科利祿計乎抑豈使子習爲言語文詞之工而已乎蓋欲成就人才以傳斯道而濟斯民也惟民之生厥有常性而不能以自達故有賴於聖賢者出而開之是以二帝三王之政莫不以教學爲先務至於孔子述作大備遂啟萬世無窮之傳其傳果何與曰仁也仁人心也率性立

命知天下而宰萬物者也今夫目視而耳聽口言而足行以至於食飲起居之際謂道而有外夫是烏可乎雖然天理人欲同行異情毫釐之差霄壤之繆此所以求仁之難必貴於學以明之與善乎孟子之得傳於孔氏而發仁深切也齊宣王見一牛之轂轍而不忍則告之曰是心足以王矣古之人所以大過人者善推其所爲而已論堯舜之道本於孝弟則欲其體夫徐行疾行之間指乍見孺子匍匐將入井之時則曰惻隱之心仁之端也於此焉求之則不差矣嘗試察吾終日事親從兄庸物處事是端也其或發見亦知其所以然乎誠能默識而存之擴充而達之生生之妙油然而於中則仁之大體豈不可得乎及其至也與天地合德鬼神同用悠久無疆變化莫測而其初則不遠也是乃聖神所傳之要從事焉終吾身而後已雖約居屏處庸庸何損得時行道事業滿天下而亦何加於我哉侯既屬某爲記遂書斯言以厲同志俾無忘侯之德抑又以自勵云爾二年冬十一月辛酉日南至右承務郎直祕閣賜紫金魚袋廣漢張某記

湘城訪古錄卷七

書院

三

文蓋宋受四年遂平荆湖又十有一年尚書朱洞來守長沙作書院嶽麓山下在國史其行事不甚較著足以考見上意所鄉爲吏者皆承休德知所先後如此豈不盛哉而其風動抑何速也五六載之間教化大治學者皆振振雅馴行誼修好庶幾於古當是時州縣猶未立學所謂十九教授未有顯者而四書院之名獨聞天下上方崇長衰異之者甚至則其教溥矣熙寧初行三舍之法頗由進士盡由學校而鄉舉益重教官之選舉子家狀必自言嘗受業某州教授使不得人自爲說崇寧以後舍法加密雖閭里句讀童子之師不關白州學者皆有禁詔合誠甚美然由是文具勝而利祿之意多老師俗儒盡鄉之書院不知起何時以予所聞漢初郡國往往有夫子廟而無教官且置博士弟子員其學士嘗課試供養與否關不見傳記然諸儒以明經教於鄉率從之者數千百人輒以名其家宋齊魯燕趙之間詩書禮易春秋講論家各甚盛則今書院近之矣縣官時遣守相勞問致饋爲禮其經生皆世守師說更相傳授不易業蓋至孝武皇帝時郡國始稍稍有學校官田觀漢晚出視其初儒者術業工拙優劣可知也已方大中祥符間天子使使召見山長周氏式

拜國子主簿詔畱講諸王官式固謝不應詔卒還山肄習如初至賜對衣鞍馬內府書而宋有戚氏吳有胡氏魯有孫氏石氏各以其道德爲人師不苟合於世著名子以是益歎國初士風之厚本之師道尊而書院爲不可廢乾道元年故帥樞密劉公珙復開寶之舊已浸廢墜今直徽猷閣潘公時亟踐修之某得官桂陽於長沙爲屬邑始詣太守請事時公至鎮適數月矣與凡郡守要東咸以寬簡闊部晏然民吏意得曾無煩目可以再三於有司者因得陪別駕後至書院謁諸先生祠下適會修事且輯諸生穆然而志專徘徊樂之不忍去也既去州教授兼山長顧杞堂長吳獵以訖役屬爲之記某嘗獲誦侍講張先生所爲記及於治心修身之要湖湘之後學亦既知所指歸近歲以其論述由太學禮部奏名及對大廷連爲天下第一他未試可略睹矣雖欲有言無以出講聞之外者而公於卿大夫爲先進年益高聞望益尊重人人能通之義何待余言者但次書院所從興廢之故繫以歲月而強附名焉是歲洎熙十有五年

### 湘城訪古錄卷七

書院

四

爲優游肄業之地故前帥樞密忠肅劉公特因舊基復創新館延請故右司侍講張公先生往來其間使四方來學之士得以傳道授業解惑焉此意甚遠非世俗常見所到也而此年以來師道陵夷講論廢息士風不振議者惜之某叨冒假守蒙被訓辭深以講學教人之務爲寄願恨庸鄙弗克奉承到官兩月又因簿書未能一往謁殿升堂延見諸生詣考所合罷行事件庶革流弊以還舊規除已請到醴陵黎君貢生充講書職事與學錄鄭貢生同行措置外今議別置額外十員以處四方游學之士依州縣則例日破米一升四合錢六文更不補試聽候當職考察搜訪徑行撥入者庶幾有以上廣聖朝教育人材之意使凡爲學者知所當務不專在區區課試之間實非小補牒教授及帖書院照會施行仍請一面指揮若干人排備齋舍几案牀榻之屬並帖錢糧官於本州贍學料次錢及書院學糧內通融支給須至行遣

元吳澄重建嶽麓書院記 天下四大書院二在北二在南在北者嵩陽睢陽也在南者嶽麓白鹿洞也其初聚徒授業不仰給於公養然嵩陽睢陽白鹿洞皆民間所爲惟嶽麓乃宋開寶之季潭守朱洞所建其議倡自彭城劉鼇而潭守成

之也時則陸川主簿孫邁爲之記紹興燬於兵乾道之初郡  
守建安劉珙重建時則有廣漢張子敬夫爲之記德祐再燬  
於兵大元至元二十三年學正郡人劉必大重建時則有奉  
順大夫朱勃爲之記逮延祐甲寅垂三十年矣瓌陵劉安仁  
來爲郡別駕董儒學事觀其做圯慨然整治木之朽者易壁  
之塌者圻上瓦下甃更徹而新前禮殿旁四齋左諸賢祠右  
百泉軒後講堂堂之後閣曰尊經閣之後亭曰極高明悉如  
其舊門廡庖館宮牆四周無不修完善化主簿潘必大董其  
役朱某張厚相繼爲長具始末請紀歲月余謂書院之肇創  
重興與今之增飭前後四劉氏道同志合豈偶然哉開寶之  
肇創也蓋惟五代亂離之餘學政不修而湖南遐邇之郡餘  
風未振故俾學者於是焉而讀書乾道之重興也蓋惟州縣  
庠序之敎沈迷俗學而科舉利誘之習鼓惑士心故俾學者  
於是焉而謀道是其所願望於來學之人雖深淺不侔然皆  
不爲無意也攷於二記可見嗚呼孟子以來聖學無傳况數  
百年之久衡嶽之靈鍾爲異人而有周子生於湖廣之道州  
亞孔並顏而接曾子子思孟子不傳之緒其源既開其流遂  
衍又百餘年而有廣漢張子家於潭新安朱子官於潭當張

湘城訪古錄卷七

書院

五

子無恙朱子自闢來潭畱止兩月相與講論闡明千古之秘  
聚遊嶽麓同躋嶽頂而後去自此之後嶽麓之爲書院非前  
之嶽麓矣地以人而重也然則至元之後復建也豈不以先正  
有經始之功不可以廢而莫之舉也乎豈不以眞儒過化之  
鄉不可以絕而莫之續也乎別駕君之拳拳加意者亦豈徒  
掠美名爲是哉其所願望於諸生蓋甚深也且張子之記嘗  
言當時郡侯所願望矣欲成就人才以傳道濟時也而其要  
曰仁嗚呼仁之道本先聖之所罕言輕言之則學者或以自  
高自廣而卒無得論語一書大示學者求仁之方而未嘗直  
指仁之全體蓋人之大如天體之無窮而其用之行於事物  
無不在邇之事親事長微而一言一動皆是也飲食居處一  
不謹焉非仁也步趨唯諾一不謹焉非仁也凡此至近至小  
甚易不難而明敏俊偉之士往往忽以爲不足爲仁不可幾  
矣嗚呼仁人心也失此則不足以爲人曾是熟於記誦工於  
詞章優於進取而足以爲人乎學於書院者其尙審問於人  
慎思於己明辨而篤行也乎  
明李東陽重建嶽麓書院記 東陽昔省墓長沙嘗渡湘江  
登嶽麓訪宋人所謂書院者得斷碑遺址於榛莽間慨晦菴

南軒二先生之餘風遺澤未有以復也顧有寺存焉耳越二十餘年則聞通判陳君捐俸治材爲中門爲左右廡甃石數級上爲講堂又上爲崇道祠以祀二先生復名之曰嶽麓書院未幾陳君以內艱去且卒通判李君錫與推官彭君琢構亭其巔名之曰極高明又買田若干畝以成陳志比王君來知府事帥府屬師生行釋菜禮諸所未及如闢道路備器用廣旁舍儲置經史延師領教皆次第舉行而同知楊君實佐其事蓋書院自宋初郡守朱洞始建眞宗時李允則請藏書國子監簿周式教授其間乃請賜額遂與應天石鼓並稱爲四大書院及南渡燬於兵安撫劉公珙復建孝宗時二先生實會講焉光宗時晦翁爲安撫更建於茲地學者遂亦多至千人田至五十頃廟舍至百餘間今殿地故在遺址廢田爲僧卒勢家所據歷三百餘年而茲院始復其舊於是王君遣使屬記於子亦陳君所嘗請也予惟古者學校徧天下其教與學者皆聖賢之道故能以一德同俗及世衰弛弛道晦不明上擇官以教下擇師以學窮什一之力而罔得世之少治而多亂奚惑哉今學有恆制師有定員第玩常渴久不能無望夫什一之外如書院者故事或起於鄉塾則於此爲培養

湘城訪古錄卷七

書院

六

之地或籍於郡學則藉遊息以廣見聞使斯道之在天下體用一源顯微無間者隨厥窮達皆可爲成已成物之用乃可以言學不然雖學於此猶學於彼無益也且南軒得衡山胡氏言仁之旨觀其爲書院記亦倦倦以是爲辭晦翁之學固有大於彼然亦資而有之彼之學者曾不逮其萬一而不百倍其功焉可哉由南軒以企晦翁又等而上之以希所謂古之人者庶幾爲茲院之重以爲山川光若其程格條緒則存夫教與學吾於吾鄉土大夫望之矣院建工於宏治甲寅七月落成於丙辰十月陳君名銅起鄉貢王君名稻楊君名茂元舉進士皆四明人吾郡之賢大夫也助建祠屋者布政參議羅君鑒都閩楊君銓府學生陳大用輩助置田者國子生李經皆郡人寺僧法印實董其役蓋亦有慕夫吾教者不欲泯其名亦附書之

楊茂元重修嶽麓書院記 長沙府治之西有山曰嶽麓又名雲麓峯南嶽七十二峯之一也居民鮮少市喧不聞泉甘而木茂壤厚而田腴一勝地也宋開寶間郡守朱公卽其地築室以待學者眞宗時山長周式以行義著召拜國子學主簿命歸教授詔以嶽麓書院名增賜中秘書尋遭兵燹乾道

改元建安劉公因舊址復建書院加藏書閣南軒爲之記乾  
道二年晦菴朱文公聞南軒得衡山胡氏之學始至長沙訪  
馬二先生論中庸之義三晝夜不輟其後文公卒更定其說  
紹熙四年詔除文公爲湖南安撫累辭不允越明年五月至  
鎮長沙士子素知向學日俟公退則請質所疑公爲講說不  
倦四方學者畢至時劉公所創書院歲久寢圯公修復之更  
建於爽塏之地規制一新焉聞諸故老書院前有宣聖殿五  
間殿前引泉作泮池其列屋殆百間其南爲風雩亭殿後堂  
室二層層各七間兩廡亦如之其外門距書院二里許今其  
地猶以賢門名而碑址尙臥田中方其盛也學徒千餘人食  
田五十頃諺曰道林三百眾書院一千徒而五十頃之文斷  
碑可考也今殿址故在而列屋頽垣隱然荒榛野莽間其址  
與食田皆爲僧卒勢家之所據矣吾友陳君綱通守於此慨  
然圖興復之遂卽文公更建之所爲大門五間兩廡各三間  
名其左曰敬義右曰誠明取文公白鹿洞賦語也北上十數  
級復建書院五間又數十級創祠以祀晦菴南軒二先生扁  
曰崇道祠繚以周垣雜植竹柏花卉於隙地然其規制則隘  
於舊矣君間嘗語余曰是役也吾捐俸爲之郡人若少參羅

湘城訪古錄卷七

書院

七

君鑒都閻楊公銓庠生陳大用輩亦有佐之者始吾擇人以  
董役更數輩弗稱後得北寺僧法印任之卒賴其力蓋文公  
之感人也深雖異端亦知向慕如此吾於祠後又治址將構  
亭以遠眺名曰極高明又欲置田百畝以供祀事以食學者  
未能也子其爲我詠之未幾君以憂去歸其鄉其同官四明  
李君錫爲構亭四楹推官吉水彭君琢國子生安化李經爲  
買田若干畝皆成君之志也郡守吾鄞王公瑄嘉是舉也關  
於風化率僚屬師生行釋菜禮又走書幣求記西涯李先生  
其文中所未及者如關道路廣旁舍備器用增公田儲經史  
皆得備書也獨余衰病蹇拙詩成而未敢以示人李君過余  
偶見之不謂辭翰皆惡堅欲磨刻於石固辭不獲乃以遺之  
而并考書院廢置與文公講學過化之詳以及故老相傳之  
言使後之君子覽而有感焉

李騰芳重建嶽麓書院碑記 按志嶽麓書院之建肇宋開  
寶迄乾道紹熙其間舉廢不一大都爲朱張講學之地而宋  
安撫劉公琪我明郡倅陳公鋼洎相繼諸公後先修葺而光  
大之者也其制門堂樓榭垣繚亭橋靡不具備左則文廟鼎  
崇後則六君子堂雲構其委蛇而上則由高明中庸諸亭以

躋諸巔禹碑劃然在焉此則書院一派所為別嶽麓禪林而興起子為諸生時每至郡過嶽麓見書院規制僅存傾圮過半則不勝珍而惜之迨丙戌郡祖虛菴吳公來守吾郡廉明宏毅百廢具舉更於書院遠溯理學宗風尤為加意凡昔所有不惟光復其舊而又多所恢拓之且與諸生時過講學校藝此余戊子鄉薦之年亦先為吳公拔識而館穀肄業於此者是余亦嘗際其盛也嗣後吳公守郡九年以治行高等遷大參歷晉方岳余亦叨售南宮濫竽館職遷延歲月垂三十餘年而以南北往來數數顧瞻於此則又見聖賢廟貌越在蒿萊講席堂軒半為蠹朽曩者衣冠絃誦之盛又值夢寐想像之餘迨今春復自京省覲旋里偶憺舟嶽麓之下散步從倚漸近書院則復見命員督役鳩工庀材斤者斧者鋸而斲者鱗次其間且荆榛草莽之盡除盤砌墁坊之具集恍然可望戊子以前光景子乃徘徊喟之且歎且幸因細詢何以及此則賴郡祖夏邑倣吾關公以進士高第陞望郎來守吾郡心政遠駕龔黃士庶欣歌禱袴且於公餘時過嶽麓追往緒嗣正統而所恢拓光大之者毋遜於前乃亟屬三守長葛龍洲韓郡祖檄參軍關隴韓君一體授以擘畫約以經費程以

湘城訪古錄卷七

書院

八

期限酌以賞罰時躬越大江而省且試焉韓君亦本其平時勤愍夙夜趨馳即風濤不避蓋五閱月而文廟書院門廡亭祠罔弗載建其地而重葺其缺遂已煥然更新且謂昔守吳公有大功於斯地道脈賴焉乃易其舊像之類者更置一位祀於六君子堂堂遂以七君子名矣韓郡祖幸其竣事大合生平崇聖慕道之心乃請諸關郡祖洎二守華陽完初高公三守萬州賓陽曾公司憲福清益謙林公諸郡祖同詣書院而落成之乃相與歎曰斯地也遞盛遞衰衰可復盛載筆紀之非史氏不可是用即屬予以記斯役子惟自有天地以來道之行世也存乎人人之任道也竅於心至論著紀載皆心所洩廟宇堂構皆心所寄其規模宏隘修葺盛衰則心精之明晦繼續實露倪焉道統自堯舜遞傳集大成於孔子而子思孟子乃其繼嗣宗派自漢以來霸王道雜禪元支指宗派幾漣越千餘載而道州崛起河南嗣之理學名儒四方響答而湖南良晤講明聖學淵源者則晦菴南軒二公實又一開關於茲矣然令非劉安撫擴衍宏基六君子諸公中興令緒與吾郡祖吳公力振廢墜光啟前謀彼遞傳之澤保無遽斬則是吳公以前之能狎主齋盟也非朝夕故矣乃吳公而後



閱歷稍久派復篋湮澤復篋斬歆字短垣之內殘崖荒壁之中安所覩中天日月而今何幸今郡祖關公慨然偕僚佐而尋盟於此也將千秋明祀於是乎崇聖賢宗風於是乎振自茲以後百千萬禩之統緒於是乎遞續而克延總之公賦卓然聖賢之品而廉明宏毅則又頡頏吳公故慕古契道彰往紹來奮然以中興道統自任者先後無兩也然則構堂增典以闡揚明德又南直以六七君子止乎政可以憲萬邦而可以師百世又於公有重賴矣詩曰高山仰止景行行止後之仰公又何以景今之仰昔耶是役也子初快觀始而今又慶其落成且冀傳公之道化於不朽也乃以實屬辭而記之

黃衷嶽麓書院祠祀記 長沙古潭州興教之地是為嶽麓書院宋建於開寶則有朱子洞歷歲而毀建於乾道則有劉安撫琪愷成而毀更建於紹興則有朱先生元晦歷歲而毀我敬皇帝宏治甲寅陳郡倅綱始復舊緒嗣而葺者則有楊郡貳茂元率亦陳諸未備者耳考書院之興廢此其大都焉方其盛時藏書則有李守允則主教則有周山長式講學則晦翁南軒二先生歆風嚮道學者計千人授餐田五十頃絃誦響絕而遊宴踵至君子慨之考教理之盛衰此其大都焉

湘城訪古錄卷七

書院

九

書院舊有祠以祀晦翁南軒潭人請以山長式郡倅綱配若或寢之而專祀朱張潭人之言文公集諸儒之成以明聖賢之道學于茲吾師焉安撫于茲吾師焉南軒鳴世大儒並時同業夫所謂過化者存焉吾祀之山長行誼鄉先生也鄉先生沒而祀於社山長有焉吾祀之始書院之鞠於榛莽也閱三百年倅斯來也異夢兆其感遺碣徵其處費也吾無與焉力也吾無庸焉治吾惠而教亦吾惠也吾祀之是烏知專之者未為失而寢之者固未為得耶潭人有辭矣君子以為義民動以義莫可拂已督學許僉憲宗魯則因舊祠以祀朱張崇道也更堂焉以祀守洞守允則安撫琪山長式郡倅綱序位以世崇教也于是潭人始慰考祠祀之沿革此其大都焉鐵橋子曰是役也有足勸者三爾大道既隱師友義衰口耳之常談無謂乎教仕進之筌蹄無謂乎學聖賢成已成物之用無復異時麗澤之餘朱張不遠千里講道湘西論中庸之義嘗越三晝夜而不合然卒于朱夫子夫以粹精如文公超悟如南軒猶不能無籍呼問辯劇難之益吾得以勸士良吏之品惟治與教故魯稱絃歌鄭美鄉校蜀郡之餘化贊皇之啟封非教莫取也後世乃有殫力簿書俛首繩檢自委于俗

且冗者猶將不免郡倅陳公卒能于文法寢密之日無守土之力而舉師帥之職若可與古良牧齒者一興教已乎吾得以勸吏民志既僞俗滋敝矣視去守令如唾洩然潭人懷惠故倅恒若申之祀事以上及乎世之賢大夫者吾得以勸俗是故士成乎學吏成乎義噫獨潭之利也乎哉

國朝周召南重建嶽麓書院記今上戊申余以鎮撫之暇與耆舊諸君子修明掌故刻長沙郡志成因而稽古今風教之盛衰則魏科大節在南宋爲尤著攷其時爲連帥郡守者多名臣大儒相與崇正學之功居多所稱師帥守牧其人則楊文靖眞西山朱考亭諸先生也所稱倡道講學其人則胡文定父子呂東萊張南軒諸先生也若夫講學肄業之地則環州邑爲書院者十數處而嶽麓爲最大朱張之講席爲最專前後安撫刺郡四劉公所創建爲最備當在咸平祥符之間海內四大書院獨嶽麓奉詔賜額頒經籍敦聘山長立三舍法則恩禮爲最異雖百世可也歷元與明四百年間教不逮古地亦代有興廢廢之既久無如今日子過其墟不能不懷然以思也既奉上詔建義學亟爲卜郡庠左師書院制選佳士而鼓昕之蒸蒸起矣諸者舊子弟復抱嶽麓圖志以

湘城訪古錄卷七

書院

十

請願得襄事還舊觀若山川文獻之靈勃然相貺爰集藩臬守令師儒而謀之僉曰避哉舉端謹者董其事得雲陽諸生劉溫良長沙義者魏朝榮任之卽以春夏之交滌其灌莽搜其殘碣疏其流泉鳩工庀材役者千指日給直作食如理家事屬郡倅某時一閱視耳江以東吏民若不知有將作也踰歲六月而工竣按圖以歷院之左阜隆起別爲禮殿陸戟廊廡如郡縣孔子廟獨循舊志尙壇像四子侍焉別增名宦鄉賢祀有事於嶽麓者爲不同院以內爲堂者二曰成德曰壽一皆講堂而成德則陳鐘鼓敷舉比之地也爲祠堂者二曰崇道曰君子報功也爲臺者一曰道鄉懷古遷客也爲亭者二曰擬蘭曰汲泉臨曲水慕冽井也合而繚之以垣凡二里許昔人動稱數年十數年次第而就者今皆巍然翼然丹雘燦然一旦復其壯觀而堅渾雅麗數倍於前謂非天人交助之力不可予因是而竊有感焉唐虞立德三代立政而教行於德政之間孔子兼之以學爲宗故子思直指修道謂教而其要言曰修道以仁夫仁亦二氏之所竊據也然二氏必不可以治天下者無其道焉耳宋儒懲唐之弊而濂溪挺生於楚文不在茲乎迨清熙乾道時諸大儒迭爲此邦之師帥牧

守以理學爲吏治南軒先生適以學侍魏公於幕府密贊忠  
勤考亭夫子嗣且以安撫帥潭政教大行比於鄒魯海內學  
者咸以嶽麓爲歸則兩公之能用其仁益明矣然而浮圖老  
子之宮當時非不並盛諸名臣大儒但力舉其政教以匡翊  
忠孝廉節之原未嘗喋喋焉與之相排擊也亦恃吾道有以  
包舉之爾今五百年昌期再振當必有紹明絕學者來主之  
予願有志之士敬業於此以求道與仁之實際而大用於天  
下勿徒滋朱陸之辯而成洛蜀之競也斯社稷賴之矣諸士  
謂落成當有記敢以鄙意質於大君子云是役也爲棟宇若  
干楹計三千餘楹方與督學議將以餼士之廩筦鑰之司山  
長堂長之名仿宋制請於朝而諸生先礪石求記其歲月  
並勒藩臬郡縣及郡人士同志而襄事者於其端  
丁思孔重建嶽麓書院碑記 古君子之出而服官也將以  
宣達政教又安士庶則必竭其力之所得爲以務其職之所  
當盡而時地之說固有所不計焉夫時有緩急則甯嬴舉繼  
無繼舉嬴是也地有難易則先其重者大者後以輕者小者  
是也然亦言其大概云爾若其修舉廢墜之心則有皇皇然  
無敢以宴安者今 皇上勵精圖治宵旰不遑凡所嘉惠元

湘城訪古錄卷七

書院

十一

元者罔不利害興剔纖鉅畢洽而必以興起教化移易風俗  
爲首務薄海內外亦既文德覃敷聲名暨訖矣頃者滇逆犯  
順負隅於衡湘洞庭間肆其蹂躪 聖天子奮揚威武不旋  
踵而底定而涖治茲土者敢遽以禮義之教望之靡敝困頓  
之民俗哉歲在甲子余忝承簡命來撫湖南經其野田尚汙  
萊入其城市猶墟落欲一旦起瘡痍而登諸衽席殆憂憂乎  
難之况於廣教而美風俗又豈易爲圖者然余深念士爲四  
民之首如隆古以鄉三物而考其德行道藝今雖不可以驟  
幾要其可從事於學者當自文義始爰是告戒九屬令府州  
縣有司博士各課其士而彙其文以上至長善二邑則親臨  
府學集而試之初觀其容色頗頽或且纒絕肘見有觸目愴  
然者既而閱其文猶可觀始嘆士之失學未有以教之也而  
教之不行又無以養之之過也攷楚志長沙舊有嶽麓書院  
爲宋張南軒朱晦菴兩大儒講學地於時遠近嚮慕絃誦之  
盛比於鄒魯前明正德崇禎時屢爲修葺兵燹後久就圯殿  
廡祠堂鞠爲茂草矣余乃上體 聖天子典學師古之意謀  
所以復之則與藩臬道府諸長吏約節其祿食慮事鳩工因  
其舊址經始於乙丑秋仲而聖殿兩廡齋舍成招致生徒肄

業其中設贍餼廩每月課試者三手自丹黃甲乙之爲多士  
勸越兩寅而高明中庸諸亭又成藏修有所遊息有寄其負  
笈來學者口益眾余又恐其養之不繼也捐俸購田三百餘  
畝以資膏火擇諸生老成者掌之然不重以朝廷之明命虞  
其久而或替也乃具疏章凡再上仰荷俞旨丁卯春 皇上  
親灑宸翰爲學達性天扁額并十三經二十一史經書講義  
遣送到山固以重道崇儒昭我國家右文之治而興起教化  
移風易俗之意實於此寓焉嗣是而御書樓講堂庖廩復次  
第告成所費不貲民不知興作之累而余之心力亦已殫矣  
學者競相激勸不獨登賢書捷南宮者若而人卽窮簷節屋  
亦漸覺觀摩興起而余調撫中州之命下矣諸生不忘所自  
乞記其事勒諸貞珉余謂之曰爲人臣者奉揚 聖天子嘉  
惠元元德意其爲庶爲富爲教道固多端茲特其初緒耳其  
何足記諸生曰夫子之爲此將傳之無窮也若作梓材旣勤  
樸斲又必從而丹雘之自今壘辟之士被野烟火之氣滿郊  
誦讀之聲遍城郭時屢豐矣民安堵矣後有來向來宣者鑒  
於茲而踵事焉日漸月靡士因文藝而敦器識民亦感慕而  
知廉耻教化大行風俗醕美豈不重有賴乎余曰唯唯否否

湘城訪古錄卷七

書院

三

古之教學者文辭云乎哉必也六德六行六言咸備於躬乃  
論秀以升功烈聲名於是焉出余行矣多士曷哉有能繼朱  
張兩夫子之遺緒講明性天之學蹤軌前型扶抑來哲仰答  
聖主作人之化余實有厚望焉是爲記

毛際可重修嶽麓書院記 衡山之峯七十二放古詩以回

雁峯爲首綿亘數百里至星沙之西南隅而始爲山之麓此

嶽麓所由名也趙宋開寶間刺史朱公洞創建書院至乾道

三年考亭朱夫子訪南軒於其地相與攷道問業一時士子

雲集景從正學丕振人謂瀟湘間彬彬有洙泗之風焉其後

興廢相仍多歷年所暨康熙甲寅值吳逆之變叛寇稱戈文

教歇絕書院將鞠爲茂草幸王師蕩平中丞丁公開府湖南

首披圖籍慨然曰郡國有先賢之遺蹟而不爲修復是在位

之責也遂捐俸爲倡片葺尺椽不以需之間里庀材鳩工浹

歲告竣自文廟尊經閣而下與夫崇道之祠四箴之亭以及

六君子堂後先相望中丞公又妙簡名流以董師之每公餘

之眼課其會業用相鼓舞父老扶杖感嘆以爲觀記以來所

未有也今年夏偶過三湘而孝廉郭君金門踵門來請曰願

有述竊謂地靈與人事常相用者也昔昌黎謂南方之山巍

然高而大者以數百獨衡爲宗中州清淑之氣蜿蜒扶輿磅礴而鬱積而書院又適當其麓則又氣之所萃毓靈而鍾秀者也然上下千百年大盛於考亭而又將復盛於今豈偶然之數歟聞中丞之撫楚整躬率屬儆貪黷賕窮乏闢荒蕪釐行戶之艱蠲夫船之役豪右畏威甘澍應禱善政不能枚舉而學教爲王化所基低徊於絃誦揖讓之間更爲觀風者所不能略也况我皇上始終典學比年以來親灑宸翰以萬世師表之額風厲學宮并求先聖先賢之裔榮以世秩而中丞公當下車之初早倦倦以建學育才爲務若有不期而合者焉蓋聖朝之有名世運會所屈一德交孚固不徒地靈人事之相因已也殆亦天意將開文治之盛化行俗美而以比隆於唐虞三代也哉遂拜手爲之記

王文清嶽麓書院四公德政紀略 書院在深山之麓創自宋開寶時江岸有古石牌坊定向與舊院向差一字朱子所欲改就之而未及爲者也乾隆中建城南書院於會城中闕闕紛華可悅而嶽麓書院遂鞠爲茂草焉時太守呂公南村聘予修長沙郡乘蹇領告子曰吾守此郡而不能復嶽麓書院吾不能見先人矣因捐俸薪請予館此子以終養固辭呂

### 湘城訪古錄卷七

書院

三

公請益力又令司馬鮑公縣尹魏公明經朱樞到門敦請予乃就席及門多應童子試者迫學憲按試邀山靈之秀入泮者凡十餘人後中式者數人其姓名今猶勒講堂右壁於是讀書士子爭束行李渡江肄業嶽麓當事亦以師生膏火移歸嶽麓書院而嶽麓書院遂從此中興矣此德政之出呂公者一也然朱子欲就之向猶未成也癸未甲申間撫軍陳公榕門毅然撥公項金若干增齋舍兩層凡數十間照依朱子所定向兩山交會大江橫繞路從古牌坊下而大出後連科賢書疊薦此德政之在陳公者二也書院在深山中入烟稀少暮夜屢受穿窬之害予亟請於驛憲熊公蕪園迺詳定更夫二名每年共給工食銀壹拾肆兩肆錢永夜輪守師生安枕此熊公之德政三也戊子年當事以術士禍福之言忽改書院偏對麓右白虎高昂千尺院中災病大作幾致撤散幸德公純菴來撫予爲先後詳述其事德公按視之曰此如人面然移菴居右耳之旁尙復成人面乎立命有司喚匠作卽行拆改刻期觀成門復舊制院中漸次安堵如故是德公之德政不居其四乎此皆予親歷其事亦通省十餘郡中所共見共聞且共仰共感者予掌嶽麓教前一載後八載今以



於院而山長周式以行義著召見拜國子主簿賜鞍馬使歸  
院主教而書院始盛高宗紹興中安撫劉珙延南軒張子講  
學其中而書院遂日益盛光宗紹熙五年朱子晦菴安撫湖  
南更建於爽塏之地立館舍置學田爲諸生講學以黎貴臣  
充講書執事而從者數千人一飲馬而池水盡竭遂有瀟湘  
洙泗之目其盛甲於天下矣嵩陽諸院皆不及也元世祖仁  
宗兩朝劉必太劉安仁次第修葺自是而廢弛者五十年至  
明孝宗時太守錢樹因元舊址重修之陳綱李錫彭琢楊茂  
元王璠踵事增華以成前志武宗朝守道吳世忠以風水未  
美遷正學基翁理孫咸置田千畝以攸人陳倫爲山長著湖  
南道學淵源錄而學使張邦奇鼓勵有加彬彬蔚起遠近稱  
頌世宗朝太守王秉良孫咸更爲建置名其齋曰誠明敬義  
日新時習舍曰天地人智仁勇復請賜書置山長如白鹿洞  
例學使郭登庸聘郡人熊宇主教事使諸生卒業逾年中式  
者十餘人一時振興遂逾其舊至神宗朝巡道李天植及吳  
道行唐源潘之植崇禎年間黃承中高世泰重爲興復然視  
朱張之盛則皆有間矣此書院修建之大略也建邦固歷千  
年恢擴尚資今日康熙二十六年我 聖祖仁皇御賜學達

湘城訪古錄卷七

書院

七

性天之額兼賜十三經二十一史於院中丞丁公力爲修葺  
嗣後賢當事接踵舉行雍正二年命生主教其中今皇上加  
意作人於雍正十一年各省皆賜千金以爲書院興賢育才  
之資更逢大中丞鍾公以宗伯師臣開府南邦仰體宸衷精  
殷化導商之藩臬兩司精心籌畫將千金別爲經營爲嶽麓  
計久遠各節其祿之所入重爲修治延李君天柱爲主教以  
司訓羅君士撰司其莞籥俾諸生讀書其中授以饗殮資之  
膏火中丞公率其僚屬親臨其地勸戒賞賚人人自奮將來  
望風雲集書院之盛於茲方始矣竊以嶽麓秀發衡山蜿蜒  
千里三湘環其下洞庭澄其旁踞湖南之勝地固重矣而又  
有朱張兩大儒講學其間而地又以人重也今我朝兩賈恩  
綸賜額賜金又有當事爲之承宣俾承久無壞其輝煌燿增  
重於書院者又越古今而上之矣獨是讀書其中者當知其  
所重不徒以工文詞弋科名爲能事務求隆德茂業以仰窺  
於天人性命之微坐言起行出而贊襄文治人倫明而王道  
成盛莫盛於此矣則庶於朱張講學之旨有得而不負 皇  
上教養之隆恩當事作育之深心也乎  
龍驤重修嶽麓書院記 盈天地間皆道也而備於人身故

道明則凡天下之物與事舉有以綱之紀之鼓舞而玉成之  
而其人以傳而其地以不朽嶽麓爲四大書院之一天下鉅  
觀也余竊謂無六君子則無嶽麓無二賢則六君子亦久而  
或湮六君子者朱洞周式李允則劉珙陳鏞楊茂元也二賢  
者張子朱子也自神禹開疆以來若陶侃馬燧裴休杜甫沈  
傅師劉長卿後先結廬於其中然不過自適其性情而已宋  
開寶朱洞爲郡守始創書院以待四方學者教化大行咸平  
中李允則爲請於朝得藏御書厥後周式爲山長眞宗召見  
便殿拜國子監主簿詔以嶽麓書院爲名使歸教授增賜中  
祕籍自是書院甲天下乾道改元湖南安撫使劉珙廓而大  
之爲屋五十楹內設禮殿外增亭池延張南軒主教事夫南  
軒得胡氏之學久矣義利公私之辨諄諄然至精且微斯時  
嶽雲若爲之霽潭水若爲之澄彼從游人士有不蹶然而興  
者乎越三年朱晦菴訪南軒於長沙論中庸之義彌月迄今  
登其堂觀其手書忠孝廉節四大字紹熙五年晦菴知潭州  
更建書院於爽塏之地堂室二層約百間立百泉軒列禮殿  
泮池障江建湘西精舍置學田五十頃聘醴陵黎貴臣充講  
書執事一時游學者輿馬之眾飲池水立涸莫不俟晦菴公

湘城訪古錄卷七

書院

夫

餘相與共質所疑旋各得其意而退當是時晦菴樂甚嗣是  
殿於兵者再興於官者三至明宏治七年通判陳綱重加修  
葺建崇道祠以祀朱張二子同知楊茂元復置尊經閣刊紫  
陽遺跡彬彬乎禮樂文章之盛其後若吳世忠陳鳳梧王秉  
良孫存林華李天植吳道行凡皆踵其事而新焉者也天地  
之道不朽六君子或引其端或衍其緒嶽麓成奧區焉我朝  
崇儒重道文教覃敷康熙初嘗依中丞丁思孔議與舉廢墜  
頌九經而藏之矣今日者桂林陳公來撫斯土究政治之源  
提理學之要甫下車臚舟過江訪古先典型慨然徒見山高  
而水清爰襲已成之規模增未備之制度振厲士風不遺餘  
力其亦斯道之幸歟夫世之學者矜騷壇之長則以駢儷爲  
尙擅風簷之勝則以剽竊爲工其於君臣父子夫婦兄弟朋  
友之懿博學審問慎思明辨篤行之要或未有以究極其精  
微而踐諸日用此陳公所目擊心惻不能遏其流而不得不  
爲之導其源者也願以公繼六君子之後闡先儒之緒言吾  
楚聞其風董其德仰其制作其必有奮然興起絕僞學之險  
僻靖俗學之浮麗存心養性蒸蒸以進於古者豈惟嶽麓不  
朽我 聖天子甄陶至意其庶無負萬一也夫是爲記



張九鐔嶽麓書院記 有山數十里突然止乎湘江之濱由  
天馬碧虛間而上溯之七十二峯蓋不知其幾于仍也而麓  
之獨擅於嶽者豈非以其人哉是山自唐始聞於時其地有  
造林嶽麓諸寺其人有沈裴宋杜韓馬諸賢大都浮屠勝境  
爲詞源風雅之處而書院者又當麓之最下自宋朱洞泐之  
眞宗額之迄晦翁南軒而大著吾以是知非其人之足以傳  
而又視乎其地與人之俱勝者則尤傳而益久嗚呼觀晦翁  
南軒當日之游歷與其所以講肄於中者可謂仙靈之氣應  
世而發而師友淵源之際何其盛也方二公往來衡湘棲止  
江潭千里聚晤終得畢其志力以講論於清曠燕間之所非  
但慕林壑之多侈亭臺之觀而已也自元明以來書院之興  
廢者再四其於創建之跡或有能繼之者至夫立教之旨爲  
學之方則皆習於好名而莫知其自又豈非後人之不能奮  
發者故雖以其地而終無以及於古與國家休養百餘年蓋  
嘗三賜敕額將以表章先儒諷諭多士於斯時也士之教者  
在魯則問舊章諸子賦詩不踰鄭志生其地讀其書以知其  
人其亦無俟於多言也已抑吾聞之爲學如登山然學山而

湘城訪古錄卷七

書院

七

必至於山則將冒危險披榛莽艱難跋涉以窮極其顛而後  
已無若麓之止而不得升也然山麓爲之基而由是以臻於  
嶽之絕頂與嵩華泰岱爭長相望嗚呼其可量也哉廉使徐  
公政暇而好文屬諸生爲之記余嘗讀書於麓者故樂而書  
之如此

陳樹萃嶽麓書院賦 歸懸巖突軒峙江城託基靈麓總冠  
南英道脈崛起理學相承仁宅光明而廣大禮門宏敞而崢  
嶸憶自開寶之年創爲朱洞之廈紹興雖毀孫主簿記其中  
頽乾道重建張敬夫力扶大雅迨乎考亭欽哉仁者既養且  
教置田廣舍吉土園橋恭人赤舄窮本究源見殫聞洽爾乃  
窺軫翼之高懸覽奎壁之映下聽右朔之鳳凰挽左躡之天  
馬橋洲爲之襟帶任消長以浮沈湘水揚其波瀾歷春秋而  
傾瀉宋元而明廢興有數來學情殷昔賢神遇清風峽裏思  
坐中化雨之來白鶴泉邊感逝者駒流之去其回眺則祝融  
嶽噪煙嵐重疊擁嶂列戟攢峯立鐵希天非尺五之可捫由  
道歎高升之難得一簣歷成數仞羨南行之一道同風入室  
本自升堂嗟北學之同歸一轍其下瞰則九江溶溶一碧濛  
濛思考亭之淵海懷南軒之朝宗或瀛洲在前徒彭子虛之

陋卽流沙密邇何堪假道而通乃者天子曰新以行乾士林  
時習而獲益師傅固屬名儒安撫亦稱時哲蹈德詠仁規周  
矩折鼓舞之道亦既盡神方寸之陰咸知是惜於是聞雞而  
起刻燭乃悟以業以競亦趨亦步偶然燕坐晴眸如對先民  
或爾出王明且尤其夙負固欲朱張之是希豈徒屈宋之足  
慕至於緒餘競秀文藻流光得句盈囊盡是湘煙澤雨采珍  
作佩固非澧草沅香豈亦思文章爲道德之華不尙風雲月  
露之何以揄揚哉每至春花榮夏漲碧紫煙凝元陰積七二  
恍惚其門入景隱約其席美仁智之同歸歎古今之懸絕誚  
躡等之徒勞歌景行之不易歌曰善夫賈大夫之言曰天地  
爲鑪兮造化爲工陰陽爲炭兮萬物爲銅我皇穆穆道崇隆  
兮多士濟濟氣冲融兮層堂崔巍嗒兮峒兮上天之載冥兮  
蒙兮光輝炫耀闢鴻濛兮千秋萬歲道無終兮  
宋趙抃嶽麓書院 兩久藏書蠹風高老樹斜鄰居盡金碧  
一一梵王家

湘城訪古錄卷七

書院

六

明陳鋼嶽麓書院 開荒不用買山貲土老分明有夢知迂  
徑遠通雲麓寺頽基新築古賢祠吾儒事業聊承昔聖學淵  
源若在茲何日松杉成拱把神游重赴草堂期  
車大任游嶽麓書院 岸柳江煙碧草紛危巒飛磴俯江濱  
星當翼軫層霄出山自岫嶼一派分秋水亭臺高楚塞春風  
絃誦入湘雲殘碑千載留神禹苔蘚年年長綠文  
高世秦感嶽麓廢院寄舊游同志 憶昔游棲嶽麓時朱張  
遺跡幾尋追滄桑忽慨儒宮廢江漢常流道澤瀾夢路虵龍  
猶見影古文岫蚪可成碑也知楚士多驕雅若箇窮愁志不  
移

黃學謙嶽麓書院廢址 萬壑空青開地勝斯文鄒魯此同  
區秋風靜日松無主澗澗何年蝸亦枯遺像恰同山鬼嘯荒  
碑殘賸石龜趺雲峯誰破蒿萊色莫使黃陵叫鷓鴣  
國朝王岱重新嶽麓書院 朱陵起疊嶂迢遙生羣峯其峯  
七十二茲山當湖衝鬱忽互江郭蒼翠來城墉上有岫嶼碑  
下有白鹿蹤昔賢傳絕學息靜時過從講堂構精傑林木多  
稱松歲深跡已圯藪澤盤蛇龍斯文應不墜興復欣再逢三  
韓有奇人經緯羅心胸既深象教祕復觀河洛宗春陵道再  
展絕構開蒙茸輪奐益軒爽氣象生肅雍斯道如日星後起  
資陶鎔嶽麓倉頡書直欲摹禹功

吳綺遊嶽麓書院 寫盡瀟湘聽雨圖何來杲日映菰蒲天  
開宿霧招游客地許名山屬大儒烏篆尙能存禹蹟龍宮空  
自鎖仙都橫經往事知何在欲訪湖南舊講徒 亂後山川  
竟若何此間遺構幸嗟峨千秋正席朱元晦一片殘碑李泰  
和衡嶽雲煙逢霽少湘江風物過秋多夕陽好處偏懷古不  
獨登臨興未磨

郭金門嶽麓書院 聖崖巍構衍千秋眺望虛無觸景幽正  
學幾人麟武接懸碑一片烏痕畱藤蘿隱見烟中寺洲渚淨  
沈水上樓遙想朱張心跡在赫曦臺下儼同游 割據名區  
半佛仙儒風獨暢此山川無言芳草依人綠有意停雲入抱  
妍曉汲花泉炊白飯夜驚藜火照青檀倚闌憑弔多遺蹟古  
瓦塵封不記年

曠敏本到嶽麓書院 宋張曾此絳筵開猶憶甘泉講學臺  
書院 姚鼐詣嶽麓書院有述 夙秉宋賢說太息懷斯文矧近講  
席前遺趾播餘芬湘東望湖西連山如陳雲亟渡入谷口空  
翠四邊分築室倚峯巒開宇面巖垠當門古澗響環墉高樹  
隳荒榛延暮色冷風交遠聞去之六百年垂教志何勤藹彼

湘城訪古錄卷七

書院

九

援鵝手傷茲獲角磨吾生志不就斯世邈無羣回爐天地晚  
空悵逝法云

劉權之新葺嶽麓書院落成有泉出講堂前姚雪門學使題  
曰文泉同人各賦詩以紀 小鑿新泉碧玉光談經擬上濯  
纓堂雲霞已煥芬楣色煙水都分筆墨香不作垂虹于丈立  
卻規明鏡一匳張此中自有蛟龍窟莫負清流共激揚 山  
腰白鶴古松前 嶽麓書院 禪微連欲動風生座虛白無塵月在  
歸藝圃肯教清綺伴行 禪微連欲動風生座虛白無塵月在  
天一自羣公題詠後從來勝地託人賢

畢沅已酉孟冬詰武星沙邀張忍齋學使王夢樓侍讀訪慎  
齋前輩於嶽麓書院過遊諸名勝攀躋絕頂摹掌古刻敘舊  
論文薄暮渡江而返得長律二章 曠谷催梅在雪先 晴  
對滌瀟如梅講堂高踞嶽雲邊名山久占關清福 先生  
有教者舊雨重逢要夙緣 兼在詞館時相過 旋旋著述  
力爭千古事毛詩箋述精 兼在詞館時相過 旋旋著述  
湘西景隔岸人呼訪戴 嶽麓書院 嶽麓書院 嶽麓書院

費仰窺鏡聲送客出 嶽麓書院 嶽麓書院 嶽麓書院  
學克紹前賢 青玉書摩北海碑 嶽麓書院 嶽麓書院 嶽麓書院

泉石松窗詩並麗文章芸篋嶽爭奇學瀾比似雲瀾潤不到  
登峰那得知

郭祖翼嶽麓書院 赫曦終古屹崔嵬四座絃歌講幄開喬  
木百年思老輩名山一代養奇才雲端梵唱隨風落檻外泉  
聲繞竹來惆悵殘碑先澤在碑泮刻翻黃鶴有碑斜陽影裏剔  
蒼苔

黃爵滋戊申四月三日雨過嶽麓書院題壁卽呈伊輔學士  
同年 卷雲亭數隔江峰欲上峰頭雲轉重小院簾櫳初乳  
燕高潭風雨正飛龍千秋禹蹟摹岫嶼片石唐碑乞李邕何  
日更來共君酌夕陽歸聽道林鐘

### 城南書院

合璧事類云在潭州臨湘門街乃南軒先生講學之地題扁筆  
勢豪勁張紫微平生得意書也其間鑿池以滙息澤之水本屬  
納氏故名納湖明統志云在府城南臨湘門外宋張栻講學之

湘城訪古錄卷七

書院

干

地一統志云宋張栻講學地鑿池以滙息澤之水其扁額四字  
傳爲張浚書省志云栻家潭時建城南書院於南門外妙高峰  
之陽其後廢爲僧寺明正德中參議吳世忠學道陳鳳梧請復  
舊觀尋併於藩府嘉靖中推官翟台作堂三楹萬曆中復圮  
國朝乾隆十年巡撫楊錫紱以嶽麓書院隔江每校課爲風濤  
所阻因遷建南門天心閣舊都司署名仍其舊城南書院志云  
道光二年巡撫左輔以地近市屢兼隣縣治復遷建今所

國朝楊錫紱遷建城南書院記 宇宙之事功視乎人材人  
材之造就在乎學校書院者拔學校之尤而切剴淬厲以收  
造士之實效輔學校之不逮也有宋四大書院曰嵩陽睢陽  
鹿洞其一卽楚南之嶽麓翔於宋長沙守朱公洞至朱張雨

夫子倡道東南大關講舍一時從游之士至于千餘人其後雖興廢不常而學士大夫談名勝之遺蹟莫不流連慨慕想見當年正學昌明或恨其生之晚或恨其地之隔亦可見先賢之澤流被無窮而書院之造就人才其有補於學校非小也我國家崇儒重道遠邁前古世宗憲皇帝特命各省會建立書院賜以帑金資其膏火湖南即因嶽麓書院葺而新之延師萃徒以宏教育中丞虞山蔣公又疏請御書道南正脈扁額敬謹懸掛作人雅化雖菁莪棫樸之盛曷以加茲乙丑夏絨來撫是邦下車即親赴嶽麓課試生童乃肄業諸生寥寥無幾詢其故緣嶽麓離城十餘里中隔湘江春夏水漲瀾漫稍遇風濤士子即畏涉不前歸而檢閱志乘長沙於宋時尚有城南書院為張魏公浚所建當時朱張兩夫子講學長沙或過嶽麓或止城南亦以湘江多阻之故是城南與嶽麓原相表裏顧久廢為僧舍不可復問以朱張兩大儒往來講學之地存其一而湮其一固湖湘都會一大缺陷事且使士子臨流興歎不得時親前賢之講席亦虛朝廷造士之本意豈非守土者所當急謀興復者哉爰是廣加諮度得都司空署一所恰在城南地勢高爽遙望嶽麓於几席然於改建

湘城訪古錄卷七

書院

三

書院為宜因借司道守牧各捐養廉鳩工庀材一閱月而落成書舍八十間恭摹嶽麓御書扁額懸之講堂岳州守黃君凝道又建御書樓於院之東南隅中祀朱張兩夫子及有功書院諸先賢以為諸生朔望行禮之所仍顏曰城南志舊也絃自維學無根柢加以簿書鞅掌日益荒落豈敢附前賢之門牆顧念國家廩給之資待士如此重道脈之揭訓士如此其殷身為守土與有化導之責則萃英俊而甄陶之延名師而課督之俾得往來於嶽麓城南二院不間綴其功庶幾因文見道由流溯源從事於講習討論之功以得乎修己治人之要處然守朱張兩夫子之正學而不為功利詞章之習所搖奪使東南之道脈益有以永其傳而擴其緒則書院之盛即學校之光也諸同人請勒諸石故為揭其興復之由與嶽麓相表裏者冀後之人兩存而並護之也左輔移建城南書院記 湘南嶽麓書院為四大書院之一自宋迄今名賢講學風教蔚然得人頗盛我朝文教日興肄業擁擠乾隆十年江右楊勤愨公錫絨來撫是邦以長沙十州縣向學日多思廣教化以嶽麓書院不錄章試且中間湘水土子赴課輒阻風濤齋舍亦限於額乃於城之東南隅

都司舊署增建學舍兼錄童試爲長沙一郡之書院以宋  
張南軒講學舊居有城南書院題額遂仍其名是城南書院  
雖仍舊名實勤愨公廣育人材所創始也按宋乾道間南軒  
先生奉父居潭築室講學父紫巖先生自書城南書院四字  
榜之舍前有池蛙聲喧聒妨吟誦先生以硯投之聲遂絕人  
稱爲禁蛙池地標納湖琮瑋谷采菱舟南阜卷雲亭聽雨舫  
麗澤堂蒙軒書樓月榭諸勝與朱子晦菴往來題詠其中爲  
當時勝地易代廢毀堂室無存明正德嘉靖及本朝康熙間  
屢議修復而難於集費今其地爲人影射瓜離割裂分佃農  
圃矣嘉慶二十五年八月在任湘藩旋晉巡撫赴城南書院  
課士周視院宇漸就頽頽齋舍亦甚逼仄基址無可擴充地  
鄰善化縣治胥獍猥雜形接影構習尚頗岐甚不足副勤愨  
公廣儲人材經營建始之本意且我朝重熙累洽壽考作人  
僻壤荒陬人文蔚起我皇上特降諭旨整理書院嘉惠士林  
無不感戴高深鼓舞思奮諸州邑士子以地居僻遠莫廣見  
聞籲請就學者甚眾而嶽麓書院齋室僅敷定額既不能容  
城南書院又不足入因念南軒先生城南書院在南門外二  
里許妙高峰之陽時問原程中丞祖洛藩湘與謀移建中丞

湘城訪古錄卷七

書院

三

忻然即率僚屬往勘焉其地麓山湘波前拱右抱高峰之岡  
坡迥衍環之撥土時露牆基間存石礎洵南軒先生書院舊  
地地幽且曠移建實宜遂定基址與問原中丞及省垣諸君  
率先捐廉購料興工通市集費逾年告成規制大備與嶽麓  
書院巍然並列各士子絃誦有所此又城南改建爲通省書  
院之始也院築外牆一周通百八十七丈院前屏牆一夾立  
兩坊左額嶽峻右顏湘清右坊後爲月榭屏牆內有池盤石  
爲欄卽禁蛙池爲門再重兩門之間迤左爲監院署中爲蒙  
軒門後爲講堂堂深六尋廣稱之堂左四齋曰居業曰進德  
曰主敬曰存誠右二齋曰正誼曰明道齋舍各二十通百二  
十舍堂後爲書樓合左右共十楹山長居之樓後高阜爲卷  
雲亭樓之左爲麗澤堂有室構長疏窗旁達爲聽雨舫吾儕  
講課息燕之所又建南軒先生祠於左齋之左前爲文星樓  
樓外有窪地如池可蒔菱橋穹然橫其旁迤帶岡阜隨其高  
下更增草亭羅植花竹亦息遊之勝地也是役也於南軒諸  
跡標舉其六固未必合於古而藉以存其名亦詩人愛樹之  
貽目以動諸生仰希古哲之意云道光二年冬堂齋既成謹  
以具奏奉旨嘉獎允賜御書扁額故摹懸之惟我多士登斯

堂也觀宸章之炳煥既慰瞻雲就日之思尚其易視改容鼓舞震動以仰副皇上右文敷教之至意而後可哉余為諸生易視聽謀居處苦心經營俾學於此豈僅以復名區為美談願諸生履先賢之居求先賢之學經明行修立體備用文章功業為盛世名臣俾我國家有得人之慶允為湘南之望也工既竣計費銀萬五千五百零監修係前任雲南迤西兵備道余正煥前任浙江道監察御史歐陽厚均董其事者封職陳新等皆自備資斧曉夜勞瘁克襄盛舉殊可嘉尚例得並書

宋張栻嚴慶胄射策南歸迂途相訪六月二十有一日同遊城南書院論文鼓琴煮茶烹鮮徘徊湖上薄暮乃歸明日作別書此為贈 炎暑盛三伏駕言得清游城南才里許便有山林幽崇蓮炫平堤修竹綠高邱方茲閱雨辰亦有清泉流舉網鮮可食汲井瓜自浮絲桐發妙音更覺風颺颺喜無舉業累獨有講學憂逮子間暇日微言要窮搜譬彼治田者黽勉在勿休但勤穡菘功勿作刈穫謀雖云千里別豈無置書郵祝子時嗣音慰我日三秋

湘城訪古錄卷七

書院

三

梅收清風來字淨寶

鑑揭頰來城南游未有今夜月呼舟從微瀾游魚亦出沒危榭倒影浮倚檻涼入骨舉酒屬西山寒光動林樾諸君興未已南阜上突兀目極大江流高情更超越

又三月七日城南書院偶成 積雨欣始霽清和在茲時林葉既敷榮禽聲亦融怡鳴泉來不窮湖風起淪漪山西捲餘雲逾覺秀色滋層層叢綠間愛彼松柏姿青初不改似與幽人期坐久還起步堤邊足透迤游魚傍我行野鶴向我飛敢云昔賢志亦復詠而歸寄言山中友和我和平詩

又四月二十日與客來城南積潦方盛湖光恬然如平時泛舟終日因分韻得水字 澤國盛梅雨漲潦彌兩涘常時侵溢患乃復到城市納湖迫西園衝突固其理今年築隄防捷石細積累艱幸迄崇成龜魚亦歡喜節宣有程度盈縮無壅底昨宵水沒岸民居例遷徙走馬來問訊屹若堅城壘江濤從渺茫湖光自清泚小舟足游泳新荷方蕤蕤嘉我二三客共此風日美相期寂寞濱雅意淡如水念言隄防功得失乃如彼而况檢身者詎可忘所止明朝更哦詩斯言或當紀

又題城南書院三十四詠 差差竹影連波靜細細荷風透屋香午寂睡餘聊隱几人間何用較閒忙 新竹成林蕉葉

青隔籬深處有蟬鳴晚涼更覺長堤靜自繞荷花待月明  
階前樹影開還合葉底蟬聲短復長睡起更知茶味永客來  
聊共竹風涼新涼物物有精神靜倚書窗聽雨聲忽憶子  
綦元未解強分天籟太麗生凌晨騎馬路新涼來挹湖邊  
風露香妙意此時誰共領波間鷗鷺靜相忘林塘過雨不  
勝秋萬蓋跳珠寫碧流倚檻孤吟天欲暮更穿芒屨上方舟  
山色頓清秋欲半湖光更淨日平西涼風獵獵低荷蓋歸  
翼翩翩度柳堤湖邊小築喜新成秋入山西照眼明不是  
厭喧來覓靜四時光景本均平秋風颯颯林塘晚萬綠叢  
中數點紅若識榮枯是真識不知何物更談空移得幽蘭  
幾本來竹籬深處手栽培芬芳不必綴爲佩月白風清取次  
開今年少雨菊花遲青葙方開三兩枝但得悠然真意在  
青山何處不相宜秋後冬前一月晴小園住處日經行半  
山木落樓臺露幾樹霜餘橘柚明鏜鼓喧喧十里城人情  
正喜上元晴瘦筇獨立湖邊路却有白鷗同眼明和風習  
習禽聲樂晴日遲遲花氣深妙理冲融無間斷湖邊伫立此  
時心曉來天氣更清新獨倚闌干正暮春花落花開鶯自  
語東風吹水細鱗鱗花柳方妍十日晴五更風雨送餘春

湘城訪古錄卷七

書院

五

莫嫌紅紫都吹盡新綠滿園還可人並湖數畝新疏闢便  
有魚兒作隊行我亦相隨浮小艇晚涼細看殺紋生無言  
桃李也成陰華底黃鸝自好音一縷爐煙清晝永章編卷罷  
短長吟化工生意源源在靜處詳觀總不偏飛絮滿空春  
不盡新荷貼水已田田野艇新成尋丈許柳堤橋浦足周  
旋添篷不但爲遮日準擬乘涼聽雨眠暮從別墅跨驢歸  
陰雨蕭蕭泥濘衣出門回首且按轡細聽泉聲和式微陰  
浪湧春江疎竹蕭蕭正雨聲眼中日影又還晴釣窗燕坐  
夏將午荷葉已香湖水清莫道閒中一事無閒中事業有  
工夫閉門清晝讀書罷掃地焚香到日脯亭畔風薰盡日  
涼來從水面過新篁悠然但覺盈襟抱千古虞絃意未央  
拍堤水滿草茸盡日野航西復東欲去未須愁日暮月明  
波面更溶溶烏雲天矯風作惡雷奔電掣雨懸河須臾天  
宇復清霽突兀西山紫翠多朝陽初上藕花香下馬虛亭  
一味涼山鳥自呼魚自樂誰云身世可相忘北窗竹簟午  
陰涼亦有清風到我旁還與陶公事同否未妨諸子細商量  
睡覺西山月正平荷香不斷曉涼生園中雙鶴知人意已



作金風警露聲 西風夜半摧炎暑 晚看雲橫天際秋時序  
轉移皆入妙惟應及早戒衣裳 新涼修竹意愈靜初日芙蓉  
葉色倍鮮物態直須閒裏見人情多向快中偏 四面紅蕖  
鏡綠波晚涼奈此野情何 憑城更覺看山穩入戶還欣得月  
多 殷雷終日在山前風捲雲環意作難薄暮有懷空佇立  
忽然飛雨到闌干  
又城南卽事 活泉細引忽盈溝 自繞書齋灑流添得眼  
前無限思石橋竹鳥共清幽 一春風雨水平湖更覺湖心  
月榭孤坐看百花開落遍依然山色對清廬 東風吹得綠  
成陰積雨初收柳絮輕記取湘中最佳處橋花開時香滿城  
月榭當湖景最奇故人千里寄新題背闌看字成相憶何  
日能來步柳堤 航艣新櫓 茅亭水滙四周遭花木經春一  
一高却望西山隔江水徑思一葉泛雲濤 嶺嶺名 枕邊風  
雨過今春起步園林已綠陰更向坡頭望湘浦水雲無際遶  
遙岑病起

### 湘西書院

湘城訪古錄卷七

書院

五

一統志云在善化縣西嶽麓山下宋劉輔建後朱子重建宋史  
尹穀傳云潭士以居學肄業爲重州學生月試積分高等升湘  
西嶽麓書院生又積分高等升嶽麓精舍生潭人號爲三學生  
兵興時三學生聚居州學猶不廢業城破多感激死義者

### 東岡書院

明統志云在長沙縣東二十五里元中書左丞許有壬父號東  
岡嘗讀書于此因賜額元史許有壬傳云先是有壬之父熙載  
仕長沙曰設義學訓諸生旣歿而諸生思之爲立東岡書院朝  
廷賜額設官以爲育才之地南臺監察御史茂巴爾斯緣睚眦

怨言書院不當立并構浮辭誣衮有壬并其二弟有儀有孚皆  
被逮有壬遂稱病歸御史累章辨其誣元歐陽元撰許熙載神  
道碑云今長沙人卽公廬墓之地作書院以表其孝請於中書  
得允賜額所植松柏愛護之成林

國朝劉正鈞榔梨江望東岡書院故址 東岡雲樹在何處  
授經堂一段嬋娟月虛含几席光燕無昔日主花剩此時香  
誰接元冲美惟親子厚鄉

### 喬江書院

明統志云在長沙縣北九十里喬口鎮舊有三賢堂祀屈原賈  
誼杜甫元元統間邑人黃澹因設義學于此詔賜今額

湘城訪古錄卷七

書院

美

### 惜陰書院

府志云在南門外靈官渡左舊爲陶公祠嘉靖四年知縣呂廷  
爵塑公像於中取惜陰意創爲書院四十二年知府蔣宏德推  
官翟台恢其制中爲明道堂建亭於中曰洗心兩旁有池曰禁  
蛙取南軒城南故事亭後建祠五間祀公木主後爲聚英樓樓  
後爲廣仁堂左右隙地分兩翼建號舍六十間集諸生肄業其  
中堂右爲望嶽樓樓前爲望嶽亭左右有田數坵前爲塘今悉  
壅淤樓右有小塘塘右有倉貯租旁爲守者居置田八百三十  
畝以贍學者郡人李棠劉應峰各有記萬曆六年詔毀書院知

府牛可麟力請獲免十一年知府吳道行知縣陳一鑑重修二十九  
年知縣陳宏乘復修仍為陶公祠四十一年推官陳大繡因長沙  
館驛傾頽改洗心亭為二門拆去聚英樓廣仁堂為阜隸房號舍  
令門役居住三間諸生自修五間餘盡拆毀省通志云國朝乾隆  
二十年巡撫陳宏謀重建書院兼新祠宇今書院廢祠存

明李棠重修惜陰書院記 郡舊有惜陰書院祀晉陶公侃公都督荆湘等州封長沙郡公有大功於民史稱公朝夕運  
甕語人曰大禹聖人猶惜寸陰吾人當惜分陰惜陰之名以此嘉靖  
甲子夏節推震川程公以名進士來茲理學淵深儒飭吏治諸生爭請  
講學於嶽麓書院願隔於大江之西每有風濤阻於往來迺於郡城外  
尋書院遺址背陰向陽麓山相

湘城訪古錄卷七

書院

七

望近城而便於諸生游從欣然鳩工拓而新之而郡守少溪蔣公適至道同志合共謀協舉期年落成為舍五十間前為明道堂中祀陶公後構聚英樓門廡池亭翼然輪奐立會長置學田屬棠為記惟時晦菴南軒講學於嶽麓城南兩書院間士子振振向往往以千數時稱潭州為鄒魯教化大行四方則之人材輩出為名臣處者表式鄉閭士至今尚節義重名檢有以風動之也而南軒為記指示人心擴充之端所以為學之方昭然具在茲吾郡二公之為是舉也夫豈使諸生羣居伏談剽竊章句便游觀為燕安之地而已誠欲成就人材明乎聖賢大學之道以求晦菴南軒之所以教學者之所以學繼承往哲鄒魯之懿範所以一道德而同風俗蓋藉是以風動之甚盛心也不然庠序學校之設徧天下土游於庠序學校獨非可學歟說者謂士方攻科舉文字之業以應上之求從事於學校之教不暇及於書院之講以彼視此判然兩事抑知聖賢大學之道豈出於科舉文字之外學校之教非書院之所講歟書院之所講而學之者又何妨於科舉文字之業科舉文字之業固孔孟之道也非朱張之所講論而詳說之者乎惟誦其言無體驗擴充之力而不知所以為學

之力專攻於科舉之業而無博文約禮深造自得之實一獲  
進取遂盡棄之視昔所攻又了不相涉矣是雖惜陰汗漫馳  
逐之耳况未之惜乎無惑乎人之難也此學之不可不講也  
學必講而後明既明矣而知大禹惜陰之所以聖必有事焉  
陶公惜陰之所以忠不徒朝夕百璧之運所以地乎天成者  
在是所以匡扶社稷者在是皆惜陰之學為之本也夫子魯  
論首曰學而時習之又曰學如不及猶恐失之孟子曰操則  
存舍則亡又曰苟得其養無物不長苟失其養無物不消知  
此則知惜陰之義矣蓋嘗因時習恐失之訓而察識於存養  
消長之際究觀乎天人之微玩易辭而有警焉人心之本體  
其象乾乎乾其純陽之卦也天之道也渾然全體固大通而  
至正一有陰以雜乎其間匪純矣匪純邪也邪暗塞也故周  
公繫乾之三爻曰君子終日乾乾夕惕若乾自初而三陽進  
而長矣乾之夕惕是時習而存養之也否則消之為陰矣夫  
子之大象亦曰天行健君子以自強不息則可以同天矣天  
不息道亦不息則學亦不息所以惜陰者其至乎學者思禹  
之聖有感於陶公之忠晉亦必由惜陰而進之審消息之機  
致擴充之力知所以為學之方以復其虛靈不昧之本體曰

湘城訪古錄卷七

書院

天

新又新焉聖賢大學之道不遠於科舉文字之業以是聚於  
斯樂於斯相觀而切劘優入乎高明廣大之域無負乎惜陰  
矣夫然中有主而守之固知至而行之利養深而應不窮言  
之為德言行之為德行異說不足以亂之勢利不足以奪之  
有得於己無待於外外之所遇不足以動其中曉然分析於  
善惡義利之辨必為君子而不為小人得志與民由之不得  
志獨行其道此之謂大丈夫願不偉歟是二公所以修湖書  
院之意也蔣公名宏德號少溪四川重慶府巴縣人丙辰進  
士翟公名臺號震川南直隸甯國府涇縣人已未進士

陽谷書院

府志云在舊府治後壽山廟巷明吉藩建

明黃學謙陽谷書院四詠 八卦樓 紺宇天高十二樓  
羲皇坐上小浮邱 交加檻影花開畫 零亂松風竹外秋  
眼底乾坤清嘯響 胸中龍馬赤文收 烟籠高閣開  
藜照一卷元經手 自警 夏雲亭 界逼清涼物  
外幽奇峰月片水光浮池邊

載馬人同簡濠上觀魚我亦周笑倒玉山移枕簟卻勾冰月  
到滄洲深怀此日傾河朔簾捲香雲拂玉鈎 秋桂軒 江  
天淼淼正高旻桂影平吞月一輪波晃朱軒雲氣白濕含仙  
蒞露華勻槎迴尚帶銀河色香滿疑分兔苑春倒屣入公方  
外客淮南秋與小山隣 凝冬亭 冉冉流霜星忽移梅花  
開早菊花遲幽亭疊石凝空翠古樹敲冰耐晚枝九乳鐘聲  
和夜酒三更檀火半新詩東平自有千秋樂寒逐光風春又  
隨

### 長沙府學

明統志云在府城正南門右宋建本朝洪武七年重建宣德六  
年重修府志云在正南門之右元至元十三年平章阿里海牙  
鎮潭州始創禮殿元末兵燬自明迄今蓋有修建

按省志云舊在城東南元遷建今所攷天臨路學先賢祠記

### 湘城訪古錄卷七

書院

完

云此依真西山舊址而重新之今碑猶存府學內則自南宋  
已遷建今地斷無疑義省志之說誤矣當從明統志爲是

宋真德秀潭州大成殿記 資政殿學士清源曾公以廟廊  
之舊作收於星沙厚重鎮俗如岳之弗搖清明鑑物如湘之  
不波歲及期而百度修眾志服環九郡五十城帖然無事思  
所以驅其人於禮義之域顧瞻巽宮先師之位在焉而廟殿  
規模殆類浮屠氏公爲蹙然弗甯徹其陪厦敬爲新宮凡二  
十有六楹昔之闔鬱條焉亢爽列戟之門學扁揭焉眠禮弗  
協別爲大門扁其上於是宮牆外內巍然煥然臆圖合法既  
又斥其贏財贊舊路復射圃起寶慶三年冬明年夏月告成  
州學正迪功郎鍾景仁等來諗曰自侯之莅吾土也嘗一新  
其學矣而斯獨未之及意者其有待乎願有以識之德秀於  
是竊有感焉而又以自愧也故不復辭而書其事斯舉也徒  
以儒者之功而雜浮屠之制猶思所以正況今之世儒名而  
墨習者滔滔皆是其可熟視而莫之救乎推公之志使一日  
盡行其學於天下必將息邪距詖而楊墨賊仁義無君父之

教不得聘必先將尊王黜霸而管商申韓矜權智驚功利之說不得施也儒者之功必至於後有以爲天常人紀之重非公其孰任之若夫學於斯學者亦曰審其所趨之塗蓮其所擇之術使粹然一出於正而已嗚呼屏翳徹而虛明出豈徒斯學爲然哉人之一心廣大如天地清明如日月者其本體也而或弗然者物有以障之也去其障則本者復矣夫問鑄金得鑄人揚雄氏所以爲善啟發也因善修之事而告之以修身之法非余所望於學者乎內外一源也精蘊一也善學者虛其心以體天下之物何往非吾進德之地又豈獨是乎哉諸君幸以爲然則願告於公而刻之公以慶元掄魁嘗陪輔先帝大政令名淑德薦紳宗之其治潭之政多可書今不書獨書所以幸乎潭之士者

### 長沙縣學

一統志云在府城新開門內明統志云在府城北門外宋建元移于府學西本朝洪武十三年徙此省志云宋時在瀏陽門內

湘城訪古錄卷七

書院

三

元至元中移建舊府學右明洪武三年移建縣東煙霞巷十一年移建北門外崇禎末燬於兵 國朝順治十五年遷建驛步門內康熙二十二年仍遷建北門外四十七年遷建今所

### 善化縣學

一統志云在縣治右明統志云在縣治西北舊在府城南門外元季兵燬本朝洪武十三年徙建省志云舊在縣南興仁坊元未燬於兵明洪武四年建於府學左十五年復建於仰山寺舊址成化十六年遷建於城東嘉靖四十一年改建今所

湘城訪古錄卷七終